

Euskararen aldeko deia egin dute Gasteizko hiru taldek

Euskaltzaleon Elkarguneak jaietara begira bultza du ekimena

Euskaltzaleon Elkarguneak, eta Txosnen eta Blusen batzordeek euskararen aldeko pregoi bat sinatu dute. Hasieratik pregoiaren ofizialtasuna lortu nahi izan dute, baina Gasteizko agintariek ez dute erantzunik eman.

Ivan Santamaria / Gasteiz

ANDRA MARI ZURIAREN jaien ataria erabili dute Gasteizko hiru talde horiek euskararen aldeko pregoia zabaltzeko. Bandoaren hasiera gazteleraz badago ere, testua aurrera joan ahala euskarak hartzen du haren tokia. Pregoiaren Gasteiz hiri ez euskalduna dela onartzen da, baina egoera horri buelta emateko euskaldunen konpromisoaren beharra aldarrikatzen da. Amaieran, «euskaraz eta kitto!» leloa jartzen du.

Peru Alvarezek, Euskaltzaleon Elkarguneko kideak, bandoaren jatorria azaldu zuen: «Jaietan jendea kalera ateratzen da, bizitza kalean egiten da. Uste dugu gure hizkuntzaren presentzia kalean aldarrikatu behar dugula. Gure hizkuntzari eraso egin beharrean horrelako ekimenak bultza behar dira». Peru Alvarezek azpimarratu zuen Gasteizen euskarak gora egin duela. «Gure gizartean euskara gora doala, eta

normalizaziorantz pausuak eman direla ezin da ukatu», Peru Alvarezek atzo adierazi zuenez. Pregoiaren izaera ahalik eta pluralena izateko, Gasteizko jaietako bi talde esanguratsuetara jo zuen Euskaltzaleon Elkarguneak: Blusen Batzordea eta Txosnen Batzordea.

Euskaltzaleon Elkargunearen helburua pregoiari izaera ofiziala ematea zen. «Izaera ofiziala eman nahi izan diogu, horretarako bai Jose Angel Cuerda alkatearekin, bai Arantza Zenarruabeitia kultura zinegotziarekin harremanetan jartzen saiatu gara, baina ez dugu inolako erantzunik jaso udal agintari horiengandik», aipatu zuen Euskaltzaleon Elkarguneko kideak. Peru Alvarezek hurrengo urteetan izaera ofizialeko pregoia lortzen saiatuko direla iragarri zuen.

Euskararen kontrako erasoak gaitzetsi zituzten • Edurne Makazaga Txosnen Batzordeko kidea euskarak azken aldian pairaturiko

ko erasoei buruz mintzatu zen: «Txosna Batzordetik uste dugu guztion artean egin behar diegula aurre euskara azken bolada honetan jasaten ari den eraso gogorrei. Hor ditugu, adibidez, AEK eta IKAKo euskaltegiek jasan dituzten eraso mediatiko eta politikoak». Bandoa bezalako ekimenak «behar beharrezkoak» dira Edurne Makazagaren ustez. «Euskararen berreskurapena eta euskararen defentsa garbi bat egiteko nahitaezkoak dira gaurkoaren antzeko ekimenak. Horrelako ekinbideak ugaritu behar dira gure hizkuntzak bizirik jarraitzea nahi badugu», Txosnen Batzordeko kidearen iritziz.

Edurne Makazagak azaldu zuenez, aurtengo jaietan Txosnen Batzordeak hainbat ekintza aurrera eramango ditu pregoiaren izpirituri jarraituz. Horien artean txosnientzako banatzaile lanean diharduten enpresei ordain agiriak euskaraz egitea eskatuko diete. Horrez gain, pre-



Bandoa irakurri zuten atzo elkarrekin.

OLALDE

goia txosna guztietan jarriko da, era horretan, txosnetara doan jendea euskaraz egitera animatzeko.

Iñaki Perez de San Vicente Blusen Batzordeko presidentearen ustez, «horrelako ekinbideak oso positiboak dira euskararen normalkuntzarako; hori dela eta blusak, jaietako agente aktiboak garen heinean, ezin dugu gure babesa ukatu». «Gure hiriko beste tradizioak bultzatzen

saiatzen garen bezala, gure arbasoen eta gure hizkuntza indartzen ere saiatu behar gara», Iñaki Perez de San Vicenterek atzoko agerraldian azaldu zuenez. Aurtengo festetan euskararentzako oroimen berezia izan nahi dute blusek. Hori dela eta, abuztuaren 7an, ostiralean, egingo den ikurriñaren aldeko ekitaldian AEK omendua izango da. x

IUk euskararen aldeko hitzarmena eskatu du

Justizia euskalduntzearen alde agertu da

Europa press / Donostia

IU alderdiak urriko hauteskunde autonomikoei begira, hauteskunde programaren zirriborroa egin berri du. Aipatu zirriborroan proposatzen duenez, euskararen egoera hobetzeko hitzarmen orokor bat garatu nahi du, gaur egungo hizkuntz egoera normalizatzeko.

Alde batetik, eremu euskaldunetan euskara sustatzeko ahaleginak egin behar direla esaten du, eta, bestetik, eremu erdaldunak euskaratzeko baliabideak jarri behar direla dio. Horretaz gainera, hiriburuetan eta herri handietan elebitasun orekatuan bizitzea ziurtatu behar dela gaineratzen du.

Era berean, hitzarmen orokor horrek justizia administrazioa euskalduntzeko neurriak jaso beharko lituzkeela esaten du. Izan ere, epaiketak euskaraz egiteko eskaerak nabarmen gora egin dutela adierazi du IU alderdi politikoak.

Hala ere, magistratuak, epaileak, fiskalak eta idazkari judizialak ez daude Eusko Jaurilaritzaren menpe, eta ondorioz, nekeza izango da justizia administrazioa euskalduntzeko prozesua, alderdi politikoak azpimarratu duenez.

Justizia administrazioaz gain, Euskal Autonomia Erkidegoko

beste administrazioak ere euskaldundu behar direla gehitu du IUk. Eta, horretarako, Hizkuntz Normalizazioaren Plangintzaren ildo nagusiak indartu behar direla gaineratu du.

Neurri horiek guztiak euskararen egoera larria konpontzen laguntzeko, eta euskaldunen kopurua handitzeko direla adierazi du aipatu alderdi politikoak hauteskunde programaren zirriborroan. Hori bai, Euskal Autonomia Erkidegoko leku bakoitzeko egoera soziolinguistikoa kontutan hartuta jarri behar dira neurri horiek indarrean, alderdi ezkeretzaleak atzo adierazi zuenez.

Neurri horiek indarrean jartzeko instituzioen arteko lan bateratua egin behar dela uste du IUk. Izan ere, Euskal Autonomia Erkidegoko kolektibo guztiak euskalduntzea da alderdiaren helburua.

IUren hauteskunde programaren zirriborroan ageri diren proposamenak Euskara Biziberritzeko Plan Nagusia onartu den aste berean ezagutu dira. Aipaturiko plana asteartean onartu zuen Eusko Jaurilaritzak, eta irailean bozkatuko dute Euskal Autonomia Erkidegoko Legebiltzarrean.

PSE-EE, UA eta PP alderdiak aipatu planaren aurka azaldu ziren. x

V I S E S A

LEHIAKETA PUBLIKOA

Eusko Jaurilaritzaren "Vivienda y Suelo de Euskadi, S.A./Euskadiko Etxebizitza eta Lurra, E.A." (VISESA) Elkarte Publikoak Lehiaketa publikorako deialdia egin du ondorengo eraikuntza lanak burutzeko:

- ◆ **1 40 ETXEBIZITZA SOZIAL ETA BABES OFIZIALEKO 40 ETXEBIZITZA, TRASTELEKUAK, GARAJEAK ETA MERKATARITZA LOKALAK ERAIKITZEKO LANAK ETA DERIOKO (BIZKAIA) ALDEKONE ETXEBIZITZETARAKO SEKTOREKO D-1 ETA D-2 LURZATIAN HIRIGINTZA OSAGARRIAREN LANAK BURUTZEKO.**

- ◆ **Kontrata-aurrekuntua:** 788.646.305 pta. (BEZ gabe)
- ◆ **Burutzeko epea:** 20 hilabete.
- ◆ **Eskatzen den sailkapena:** C Taldea, 2 Azpitaldea, f) Maila.

- ◆ **2 32 ETXEBIZITZA SOZIAL, TRASTELEKUAK, GARAJEAK ETA MERKATARITZA LOKALAK ERAIKITZEKO LANAK ETA ORIOKO UDALERRIAN (GIPUZKOA) -ANIBARKO PORTUA- 4.1.13 ALDEAREN 1 LURZATIAN HIRIGINTZA OSAGARRIAREN LANAK BURUTZEKO.**

- ◆ **Kontrata-aurrekuntua:** 300.233.767 pta. (BEZ gabe)
- ◆ **Burutzeko epea:** 18 hilabete.
- ◆ **Eskatzen den sailkapena:** C Taldea, 2 Azpitaldea, e) Maila.

- ◆ **Burutzapen Proiektuaren eta Klausula Pleguaren azterketa:** 1998ko abuztuaren 3tik aurrera.

- ◆ **Kopiak honakoetan lortu ahal izango dira:**

- ARCO Fotokopiadenda: San Antonio Kalea, 16 zk. 01005 Vitoria-Gasteiz. Tel. 945/232813
- CIANOPLAN Fotokopiadenda: Rekakoetxe Kalea, 8 zk. 48010 Bilbo. Tel. 94/4436591
- ASKAR Fotokopiadenda: Bizkaia Pasealekua, 17 zk., behe. 20010 Donostia-San Sebastián. Tel. 943/454726

- ◆ **Aipatu dokumentazioa VISESAn ikusi ahal izango da:** Gasteiz Hiribidea, 43 behe. 01008 Vitoria-Gasteiz.

- ◆ **Proposamenen aurkezpena:** VISESaren egoitzan. Gasteiz Hiribidea, 43 behe. 01008 Vitoria-Gasteiz. 1998ko irailaren 15eko eguerdiko 12ak arte.

- ◆ **Eskaintzak jendaurrean irekitzea:** VISESaren egoitzan. 1998ko irailaren 16ko 12etan, lehendabizi Deriokoak irekiko dira eta ondoren Oriokoak.

Iragarki honen zenbatekoa esleipendunek ordaindu beharko dute neurri berdinean.



Herri-Baltzua
Sociedad Pública del



EUSKO JAURLARITZA
GOBIERNO VASCO

LURRALDE ANTOLAMENDU
ETXEBIZITZA ETA INGURUGIRO SAILA
DEPARTAMENTO DE ORDENACIÓN DE TERRITORIO,
VIVIENDA Y MEDIO AMBIENTE